

Illoqarfimmi Nuummi katerisimaartarnernut allanullu tunngatillugu killilersuigallarnerit inerteqquteqartitsinerillu pillugit Namminersorlutik Oqartussat nalunaarutaat nr. 10, 14. april 2020-meersaq Atuussimasoq (Historisk)

Nappaatit tunillaassortut akiorniarlugit iliuitsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a aamma 12 a, 12 b kiisalu § 29, imm. 2 malillugit aalajangersarneqarpoq:

Atuuffii

§ 1. Nalunaarut illoqarfimmut Nuummut atuuppoq, taamaattoq takuuk imm. 2 aamma 3.

Imm. 2. Nalunaarut Dronning Ingridip Napparsimavissuanut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. §§ 3 aamma 4 katersuunnernut politikkikkut allatulluunniit isummersornissamik sunniiniarnissamik siunertalinnut atuutinngillat.

§ 2. Nalunaarut malillugu killilersuinerit, inerteqquteqartitsinerit, peqqusinerit il.il. 30. april 2020 tikillugu atuutissapput.

Katersuunnernut il.il. tunngatillugu killilersuinerit

§ 3. Aaqqissuussanut, nalliuttorsiornerit, sammisaqartitsinerit assigisaanulluunniit inuit 10-t qaangerlugit peqataaffigineqartunut ingerlatsinissaq peqataanissarlu inerteqqutaavoq.

Inerteqquteqartitsinerim ilaatinneqarput illup iluani, silami, pisortat inuillu katerittarnerat, aaqqissuussinerit pisussallu il.il.

Imm. 2. Peqataasut taamaallaat inoqtigiiuppata imm. 1 inissiamut atuutissanngilaq.

§ 4. Inuit qulit sinnerlugit tamanit katersuuffigineqarsinnaasumiippata, § 3, imm. 1-imullu pisup ilanngunneqarsimannginnera aqutugalugu inuit politiit naliliinerat malillugu nappaatinik ulorianartunik nalinginnaasunik immikkut tunillatsinnissamat ulorianartoqarfiusuni, politiit inuit piffimmiit qimatseqqullugit peqqusisinnaapput.

Imm. 2. Politiit imm. 1 malillugu naliliinerat nappaatinit ulorianartunit nalinginnaasunit tunillatsissinnaanermut tunngatillugu Nakorsaaneqarfiup innersuussutai nalinginnaasut eqqarsaatigalugit pissaq.

§ 5. Politiit § 3-mi inerteqquteqartitsinerup eqqortinniarnissaanut nakkutiginninnissaq siunertaralugu ininut sumiiffinnullu allanut eqqartuussivik akuersiseqqaarnagu isersinnaapput.

Imm. 2. Inissiaq imm. 1-imi ilaatinneqanngilaq.

Pisortat suliffeqarfiutaannut isersinnaaneq killilersuinerillu

§ 6. Suliffeqarfiit kulturimik, ilageeqarnermik sunngiffimmillu sammisallit pisortanit pigineqartut Nappaatinut tunillaassortunut inunnut iliutsit pillugit Inatsisartut peqqussutaanni § 22, imm. 1-imut ilaangitsut iniutitik tamanut mattuteqqassavaat.

Ininut assigiinngitsunut isersinnaaneq killilersuinerlu

§ 7. Inuussutissarsiummik ingerlatallit ininik makkuninnga tamanut mattusseqqassapput:

- 1) Unnukkut klubbit, qitigiartarfiit, imerniartarfiit, il.il.
- 2) Neriniartarfiit, cafeet il.il., tuniniaaffiusumi nerisassanik sassaalliutigineqartunik nerisarfiusut, aamma imigassanik sassaalliutigineqartunik imertarfiusut, taamaattorli imm. 2 takuuk.
- 4) Sumiiffiit timersornermik ingerlatsiviit sunngiffimmilu sammisassaqartitsiviit, taakkununga ilanngullugit timersoriartarfiit, nalunnguartarfiit, sungiusariartarfiit, isiginnaartitsisarfiit filmeriartarfiillu.
- 5) Kakiuisartut, iverusersuisartut, eqissisimaarluni uffariartarfiit, timigissartarfiit, pinnerasaarfiit tagiartuisarfiillu, nujalerisut inillu allanut kiffartuussiviusartut ilusimikkut timimik qanimut attuiffiusartut palersaartarfiillu.

Imm. 2. Neriniartarfiit sassaallertarfiillu imm. 1, nr. 2, apeqqutaatinnagit aamma nerisassanik imeruarsaatinillu tuniniaaffiusumi iioraaffiusussaannngitsut (take-away) tuniniaanissaq siunertaralugu tamanut ammatinneqarsinnaapput, taamaattoq takuuk § 9

Nuuk Centerimut isersinnaaneq killilersuinerlu

§ 8. §§ 7-p 9-llu saniatigut Nuuk Centerimut makku atuupput:

- 1) Nuuk Centerimi ammaannartuniinnissaq inerteqqutaavoq. Niuertarfinnut, suliffinnut allanullu iserniartilluni ammaannartut aqqusaarneqarsinnaapput.

- 2) Niuertarfiit allallu Nuuk Centerip isaariaata eqqaaniittut pisisartunik orninneqarsinnaasut periarfissamik matuminnga atuisinnaasut matutik ilorliit matoqqatissavaat.
- 3) Niuertarfiit allallu Nuuk Centerip isaariaata eqqaatigut pisisartunik orninneqarsinnaanngitsut immikkut maleruaqqusanik Nakorsaanerup aalajangersagaanik malinnissapput.

Ininut kikkunnilluunniit iserfigineqarsinnaasunut piunasaqaatit

§ 9. Inuussutissarsiummik ingerlatallit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piunasaqaatinik makkuninnga naammassinnissimassapput:

- 1) Natermut kikkunnit tamanit iserfigineqarsinnaasumut 4 m²-iusumut amerlanerpaamik inuup ataasiinnaap isersimanissaa akuerineqarsinnaavoq. Nateq 4 m²-imik mikineruppat oqaaseqatigiit siulliit apeqqutaatinnagit inuup ataatsip isersimanissaa akuerineqarpoq. Nateq oqaaseqatigiinni siullerni pineqartoq qanoq pequteqartiginera apeqqutaatinnagu iikkamiit iikkamut naatsorsorneqassaaq.
- 2) Init ajornanngippat imatut pequsersorsimassapput tuniluunnissaq minnerpaaffianiitinneqassalluni, tassunga ilaalluni pisisut pulaartullu imminnut qanillinnginnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqiluisaarnissaaq ileqqorissaarnissarlu pillugit paasisutissanik nivinngaasoqassaaq. Paasisutissat oqaaseqatigiinni siullerni taaneqartut Nakorsaaneqarfimmiit tamanut saqqummiunneqassapput.
- 4) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq. Innersuussutit oqaaseqatigiinni siullerni taaneqartut Nakorsaaneqarfimmiit tamanut saqqummiunneqassapput.
- 5) Pisisunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 6) Nerisassanik poortorneqarsimannngitsunik tuniniaanermi sulisut aqqateqassapput.

§ 10. Inuussutissarsiummik ingerlatalik politiit naliliinerat malillugu § 9-mik unioqqutitsisimappat, inuussutissarsiummillu ingerlatalik § 9-mik malinninnissaa ilimagineqanngippat, inimik piffissami aalajangersimasumi tamanut matoqqatitsinissaannik politiit peqqusinnaapput.

Angallanneq

§ 11. Bussit bussimi issiaffiusinnaasut qaangerlugit ilaasoqaqusaanngillat.

Imm. 2. Angallatit allallu kikkunnut tamanut angallassinissamik neqeroorutillit §§ 3 aamma 4 malillugit ilaasoqarsinnaapput.

Pineqaatissiissutit

§ 12. Inuit § 3, imm. 1-imik imaluunniit §§ 7-9-mik aamma 11-mik unioqutitsisut imaluunniit § 4, imm. 1 imaluunniit § 10 malillugit peqqusineramik unioqutitsisut Kalaallit Nunaannut Pinerluttulerineramik Inatsit malillugu pineqaatissinneqarsinnaapput.

Imm. 2. Ingerlatseqatigiiffiit il.il. (inatsisilerinerimi inuttut immikkoortutut isigineqartut) pinerluttulerineramik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq nalunaarummilu allami allanngortitsineq

§ 13. Nalunaarut ulloq 15. april 2020-mi atuutilissaaq,

Namminersorlutik Oqartussat, ulloq 14. april 2020

Martha Abelsen

/

Tine Pars